



President Gion Felici Monn, Tujetsch
CR 1956, pag. 53

Sin fossa ded in bien amitg astgan ins buca schar crescher pastg memi spert. Perquei seregorda il Calender Romontsch en pietad dil car e fideivel defunct president e deputau Gion Felici Monn. Naschius ils 16 de mars 1876 a Zarcuns, Tujetsch, fegl de statalter Martin Felici Monn e Marionna Catrina Hitz, ha il svegliau e frestg mattatsch frequentau la scola primara a Camischolas ed ei lu serendius 1890 en claustra a Mustér per far la preparanda ed ina classa reala. Igl onn suenter concluda el la scola reala a Sviz e tuorna mo nuidis a casa, perquei ch'el havess giu dun e talien d'emprender latin. Siu bab ei buca de siu meini. Lez haveva mo quei fegl (sper ina feglia) e quel leva el mantener per siu bi menaschi puril. Sch'il fegl tulenava, scheva il bab magari: »Dus dis hai jeu era empriu latin«. Cun quei fuva la discussiun finida. Il Gion Felici ha obediu ed ei daventaus in pur de vaglia, che capeva e carezava sia clamada. Obedend a siu bab ha el era desistiu pli tard de far carriera militara, ch'el havess giu la pusseivladad de far.

Anno 1901 eis el maridaus cun la giuvna Maria Nesa Cavegn de Sedrun ed ei lu secasaus a Camischolas. Quella ha schenghegiau ad el 5 affons, mo gia il december 1908 eis ella morta. Ina greva frida. Dus onns pli tard marida el la vieua Anna Maria Riedi-Cavegn. Dieus benedescha el aunc ina ga cun 2 affons. Igl ei stau ina ventireivla letg, mo era quella dunna e schizun entgins dils affons ha Niessegner clamau avon ch'el. Quellas uras de dolur e tristezia ha il car defunct purtau el spert de vera resignaziun cristiana.

Sper siu menaschi puril ha el fatg peda de survir da giuven ensi alla vischnaunca ed al cumin. Igl onn 1903 han ins eligiu el gerau e 1907 schizun president de vischnaunca (1907-15 e 1929-35). In tschuppel onns eis el staus derschader de cumin e derschader districtual ed entgins periodas era deputau dil Cussegl grond. La vischnaunca de Tujetsch ha d'engraziar in bienton a sia iniziativa e lavour. Cheu anflein nus il Gion Felici sco iniziant dell'ovra electrica de Sedrun, ch'el ha presidiau buca meins che 27 onns (1918-1945). Biars onns ha el era luvrau en la suprastanza dil consum liber ed en outras societads.

Mo tut quei dat buc in maletg cumplein dil defunct. Sper il quita per sia carezada famiglia e sper la nunstunclenteivla lavour sociala per quei e tschei intent, ha el impundiu biaras e bunas uras per caussas puramein idealas. Tgi less descriver con temps ch'el ha sacrificau per las differentas uniuns, sco commember d'honur dil chor viril e della sociedad de musica e cun mussar teater. Cheu fuv'el propri en siu element. Aunc en ses vegls dis s'interessava el passionadamein dil teater ed insumma della cultura romontscha. Da giuven ensi eis el s'occupaus reguladamein dil lungatg, tradizion e cultura de nies pievel, ha translatau teaters, raquintaziuns e novellas, ch'ein per part cumparidas en nos organs (Pelegrin, Calender Romontsch, Gasetta Romontscha) e ch'ein per part restadas manuscret. Entiras notgs ora pudeva el leger e scriver de quellas caussas senza negligir sia lavour quotidiana. Perquei anflein nus forsa strusch in secund, ch'enconuscheva la tradizion ed il lungatg tuatschin meglier ch'il deputau Gion Felici Monn. El scriveva e plidava in lungatg genuin, marcant e sonor e seturpegiava mai de sia viarva ni avon jasters ni dumiastis. La mumma romontscha ha piars cun el in de ses megliers amitgs, in ver idealist e fideivel combatant.

Tgi che ha enconuschiu il car defunct sa era, che quel ei staus in um de profunda cardientscha e religiusedad, in um gest e sincer, ch'era promts de defender la giustia avon mintgin ed in um de bien cor, che ha gidau biars cun ovras e buns cusseglis. In tal um mereta, ch'ins mantegni el en buna regurdientscha. Avon in onn, ils 11 d'october 1954 ha il Segner clamau siu fideivel survient tier l'armada gronda, nua ch'el ha segiramein anflau in buntadeivel derschader, pertgei ils davos onns de sia veta ein stai umbrivai d'ina greva e lungurusa malsogna. Possi il carezau amitg guder ussa la glisch dils beai per pagaglia de tut quei, ch'el ha prestau e suffriu duront siu liung e fritgeivel viadi terrester! G. D.